

Kata Pengalo – Ngalo Ras Momo

=====

Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat Wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanen perpulungen Tuhan, bage pe rencana pelayanen gerejanta ku bas wari-wari si reh enda ([Ngogeken Momo](#)).

Kata Penaruh

=====

Turang ras senina, malem ateta sabab tetap denga iarak-arak
Dibata kegeluhenta seh banci jumpa ka kita bas Rumah Pertoton
enda.

Minggu enda bengket kita kubar Minggu Pendidikan sue ras
Kalender gerejanta GBKP, si enda silakoken erkiteken Dibata
ersura-sura gelah anak-anakNa pentar erkiteken ndatken
pendidikan si payo, subuk pendidikan secara *formal* bagepe
informal. Pendidikan e nampati kita ngukuri ras ndalani
kegeluhen alu mehuli. Emaka mari sipesikap ukurta alu dem
ketenengen ras sigejabken Dibata lit i tengah-tengahta.

Erkata Lonceng

(Perp. Tedis)

Rende

KEE No. 14 : 1, 2, 3

(Serayan Kebaktin Bengket Ku Mimbar)

Kebaktin Minggu, 27 September 2026
Minggu XVII Kenca Trinitatis / Minggu Pendidikan
(Penjemaaten TK-PAUD GBKP)

3	Votum – Salam <i>(Perp. Tedis)</i>
L	I bas gelar Dibata Bapa si jadi ulu gegeh ras kepentarenta, i bas gelar anakNa Jesus Kristus si enggo mereken kepentaren e man banta ras i bas gelar Kesah Si Badia si tetap ngajari kita guna tetap nggeluh i bas kepentarenNa. Perkuah ate ras dame i bas Dibata Bapa ras i bas Tuhan Jesus Kristus nari, i bas kerembaken Kesah Si Badia ras kita kerina gelah. Amin.
P	Amin Amin Amin <i>(iendeken)</i>
4	Berita Kerna Perbahanen Ras Sura-Sura Dibata (Invocatio)
L	“Dalan ku kepentaren, Dibata ngenca metehsa; itehNa i ja ingan ndatkenca” (Jop 28 : 23). Erpalasken Kata Dibata enda, sipuji IA alu radu ras ngendeken : KEE No. 399 : 1, 2, 3
5	Berita Kerna Dibata Simereken Kepentaren Man BangsaNa <i>(Perp. Kundul)</i>
L	Turang ras senina, Dibata me ulu kerina kepentaren i bas doni enda. I bas perdalanan bangsa Israel bengket ku bas taneh perpadanan Dibata e, Dibata enggo leben ngkuhi bangsaNa alu pemeteh ras kepentaren arah Undang-undang si ipeseh Musa man bangsa Israel. Tujunna gelah bangsa e erkemalangen man Tuhan dengen nggeluh i bas biak si mbaru. Alu bage bangsa Tuhan banci jadi bangsa si pentar i tengah-tengah bangsa si deban. Mari sipuji Tuhan si jadi ulu gegeh ras kepentarenta, alu ngendeken : KEE No. 374 : 1, 2, 3
6	Kinata Kerna Geluh Manusia
L	Tuhan mereken kepentaren man manusia gelah ngasup ngaturken kegeluhen si reh ulina, subuk i bas perukuren bagepe perbahanen. Si jadi tanggungjababta eme geluh erpalasken kepentaren Dibata dengen nuduhkenca i bas jabunta.

Moria	Ngaku kami Tuhan, megati la ipakeken kami gegeh ras kepentarenNdu i bas ngajarken anak ras kempu kami. Sura-sura kami ngenca ipenggurui kami, piah anak kami enggo tertaban, i bas keterbatasan kami. Ulih pengajaren kami ndai dungna nambahi ate kami mesui.
Mamre	Ngaku kami Tuhan, kurang ate kami tutusna nggeluh i bas kepentarenNdu, seh maka la kami ngasup ngajarken ras nuduhkan kepentarenNdu kubar jabu kami. La i idah anak ras kempu kami kepentarenNdu arah perukuren ras perbahanen kami.
Anak	Ngaku kami Tuhan, kurang kal kami ndarami pemeteh ras kepentarenNdu. Usuren kami ikuasai pemeteh si mabai kecedan geluh kami.
P	Tuhan, pengasup min kami nggeluh i bas pengajarenNdu, ndalanken dengen nuduhkenca i bas jabu kami.
L	Sipindo dage gegeh man Tuhan gelah kita ngasup nggeluh i bas kepentarenNa arah ende-endenta : KEE No. 377 : 1, 2
7	Kata Dibata Simpeteguhi Manusia i Bas Makeken KepentarenNa <i>(Perp. Tedis)</i>
L	Dibatanta perkeleng dengen perkuah kap. NiNa i bas Ulangen 6 : 18 a : <i>“Dahiken lah kai si mehuli ras payo bagi si ikataken TUHAN gelah mejuah-juah kam”</i>
P	Amin.
L	Malem ateta i bas perkeleng ate Tuhan e, mari dage tole sipuji Tuhan arah ende-endenta : KEE No. 269 : 1, 2, 3
8	Kata Dibata <i>(Perp. Kundul)</i>
a	Marilah sibegiken Kata Dibata si man ogenken ibas Minggu enda sini ibuat ibas Kitab Johanes 7 : 10 - 18 . Mari siogeken secara pegancih. Sibenaken pengogenta

	<u>Jesus i bas Wari Raya Sapo-sapo</u>
7:10 L	Kenca lawes senina-senina Jesus ku wari raya e, Jesus pe lawes ku je. La IA terang-terangen lawes, tapi erbuni-buni.
7:11 P	Kalak Jahudi si erkuasa ndarami Jesus i bas kerja e. Nungkun ia nina, “I ja ndia IA?”
7:12 L	Nterem kalak erkusik-kusik kerna Jesus. Lit si ngatakenca, “IA kalak bujur kap.” Tapi lit ka si ngatakenca, “Lang! Itokohina kap kalak si nterem!”
7:13 P	Tapi sada pe la pang terang-terangen encakapken Jesus sabap mbiar ia kalak Jahudi si erkuasa.
7:14 L	Kenca menam setengah acara perayan e erdalan, bengket Jesus ku Rumah Pertoton, jenari ibenakenNa ngajar.
7:15 P	Mamang kal ate kalak Jahudi si erkuasa ngidah IA ngajar e. Nina, “I ja nari nge pemetehNa e kerina adi IA labo pernah sekolah?”
7:16 L	Ngaloi Jesus, “Kai si Kuajarken e labo i bas Aku nari, tapi i bas Dibata si nuruh Aku nari nge.
7:17 P	Kalak si ndalanken peraten Dibata alu ukur meriah, ietehna nge ntah i bas Dibata nari ntah i bas Aku nari rehna pengajarenKu enda.
7:18 L	Kalak si ngajar rikutken pemetehna, iusahakenna nge gelah ia terpuji. Tapi kalak si ersura-sura gelah si nuruh ia terpuji, bujur kap, la lit si palsu i bas ia.
	Ketuahen kalak si megiken Kata Dibata, dingan si makekenca i bas geluhna si teptep wari, Halleluya. Ialoi perpulungen alu ngendeken : <i>Halleluya Halleluya Halleluya</i>

b	Ertoto guna Khotbah
c	Khotbah : Esra 7 : 6 - 10. Tema : “Meganjang Dingen Mbages Pemetehna”
d	Ertoto kenca khotbah
9	Pengakun Kiniteken <i>(Perp. Tedis)</i>
	Aku tek man Dibata Bapa si la ersibar kuasaNa, si nepa langit ras doni. Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate. Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap. Amin.
10	Persembahen <i>(Perp. Kundul)</i>
L	Genduari ibereken kesempatan man banta guna ngendesken persembahen pengataken bujurta man Dibata. Si jadi palas man banta guna nehken persembahen eme : <i>“Dibatangku si simpar alu kebayaken si lit i bas Kristus Jesus mereken kerina keperlunndu”</i> (Pilipi 4 : 19). I bas kita ngendesken persembahen ras kita rende i bas : KEE No. 420 : 1, 2, 3 Pertoton Persembahen ras Syafaat
11	Perpadanen Man Dibata <i>(Perp. Tedis)</i>
L	Turang ras senina, kita enggo ngaloken kepentaren i bas Dibata nari gelah sipakeken i bas kegeluhen dingen ngajarkenca man anak ras kempunta. Kuga dage ninta ?

Moria	Erpadan kami Tuhan, tetap nggeluh i bas kepentarenNdu si jadi gegeh kami ngajarkenca anak ras kempu kami.
Mamre	Erpadan kami Tuhan, tetap tutus nggeluh i bas kepentarenNdu, seh maka kami ngasup ngajarken ras nuduhkan kepentarenNdu i bas jabu kami.
Anak	Erpadan kami Tuhan, ngaloken pengajaren si erpalasken kepentarenNdu.
L	I bas kita mpeteguhi perpadanenta ras Dibata, ras kita rende arah : KEE No. 433 : 1, 2, 3
12	Pertoton Tuhan
13	Pengutusen Ras Pasu-Pasu Dibata
L	Bengketilah kegeluhenndu si dem alu kepentaren Dibata, guna mpegegehi kam i bas makeken ras ngajarken kepentaren Dibata e, alokenlah pasu-pasu idur Dibata nari : <i>“Dibata si mada perkuah ate, sienggo nenahken kam ku kemulianNa si rasa lalap i bas Jesus Kristus njadien kam serta, njadien kam tetap ras njadien kam megegeh dengen paguh. IA nge si mada kuasa seh rasa lalap” Amin.</i>
	Ialoi perpulungen alu ngendeken : A..min A....min Amin
	<i>SELAMAT HARI MINGGU/SYALOOM.....</i>